

Un Otro Aña di Famia

Falta poko dia pa aña di famia klousurá. E aña aki, hopi idea a ser tresí dilanti i promové pa ku e famia. Algun surgenesia tabata na nan lugá. Otronan tabata apsurdo i tin bes asta destruktivo, manera Ellen Goodman (un kolumnista ku artíkulonan den e korant *Aruba Today*) su proposishon pa kada yu "nase i ser kriá den un famia unda tin tres mayor. Si, mi sa, e famia di dos mayor ta basá riba reprodukshon biológiko. Ma esaki ta dekada 90."

Ideanan ridíkulo i destruktivo no ta nobo. Durante siglo 18, Jean Jacques Rousseau a introdusí un filosofia nobo pa ku kriamentu di yunan. Segun e, muchanan ta outomatikamente bon, i mayornan mester pèmití nan pa ekspresá e tendensia aki. Awendia hopi eksperto di infansia, siguiendo e filosofia aki, ta denunsiá moralidat komo represivo i sofokante.

Poko aña pasá, dos kriminólogo, James Wilson i Richard Hernstein, a skirbi un *buki Crime and Human Nature*. En kontraste di Rousseau, nan a nota ku maldat ta e tendensia natural di e ser humano. Si e konsenshi no ta ser desaroyá durante infansia, un bida di krimen lo sigui. E komportashon di adultonan ta reflehá e instrukshon moral ku nan a risibí komo mucha.

Wilson i Hernstein tin rason! Hende ta nase ku un tendensia pa hasi malu, no bon. Ningun mama òf tata tin ku duna nan yu lès pa desobedesé, gaña, hòrta, rabia. E sa esei di mes. E ta "programá" pa hasi malu kaba. Beibel, Manual di Esun ku a krea kada mucha (i pues sa pèrfektamente kon un ser humano ta funshoná optimal) tambe ta komprobá esaki. E ta deklará, "Ata, for di nasementu kaba mi tabata pekadó--i den piká mi mama a konsibími" (Salmo 51:5). Kada yu ta pekadó méskos ku su mayornan, welonan, bisawelonan, èts, pasobra nan a heredá e naturalesa aki for di su antipasadonan pekadó, Adam i Eva.

Debí ku esaki ta e kaso, Beibel ta enfatisá ku mayornan tin e responsabilidat pa eduká nan yunan pa hasi loke ta bon, moral, i korekto. "Boso tatanan...kria nan (yunan) den disiplina i spiertamentu di Señor" (Efesionan 6:4). Dios ta bisa: "E palabranan aki (Dios Su instrukshon)...bo mester siña nan kuidadosamente na bo yunan" (Deuteronomio 6:6-7).

Nos komunidad chikitu tin problemanan serio awendia, PASOBRA hopi mayor ta bai tras di e (supuesto) "ekspertonan" na lugá di Dios. Nan a bandoná nan tarea pa eduká nan yunan. Komo resultado, yunan siguiendo nan naturalesa pekaminoso, ta hasi loke nan ya kaba tin tendensia pa hasi.

Resientemente wes meester Stuger, den un simposio oraganisá pa Amnesty Kòrsou, a trese dilanti ku gobièrnu mester hinka hopi sèn den enseñansa pa prevení kriminalidat. El a nota ku mayoria malechor ta muchanan entre 16 pa 23 aña di edat ku no a yega te klas seis. Wes Stuger tin rason ku enseñansa ta importante pa prevení kriminalidat, ma e ta kiboká ku edukashon NA SKOL ta e solushon. E enseñansa mas bien, mester kuminsá NA KAS! Mayornan no por stèn riba skol pa korigí e resultado di nan flohera. E miles i miones di florin adishonal ku gobièrnu por invertí den edukashon eskolar lo ta un frakaso si mayornan no ta tuma nan responsabilidat na serio.

Ta tempu pa mayornan stòp di papia tokante kriminalidat. Ta tempu pa mayornan stòp di pone man na kabes i kritiká e generashon hóben di awendia. Ta tempu pa mayornan kuminsá aktua i sòru ku NAN YUNAN lo no sigui e ruta kriminal

Kon esei ta pusibel? Kada mama i tata na nos islanan mester kuminsá traha tempu pa nan yunan, mustrandu nan loke ta bon i loke ta malu, i duna nan un ehèmpel positivo ku e mucha por sigui. E mihó edukashon ku yunan por haña ta instrukshon bíbliko. Si mayornan ta invertí tempu adekuá pa duna enseñansa moral, sin duda ku tempu lo nos nota un kambio drastiko den nos lucha kontra kriminalidat.

Aña di famia ta bai kaba. Ma e tarea pa kria bo famia ta sigui. Mama, tata, ningun pèrsona por remplasá abo. Tuma bo responsabilidat na serio pa eduká bo yunan presioso. Kuminsá awe i sigui otro aña. Aña di famia por pasa pa olvido, ma di bèrdat, kada aña ta un otro aña di famia!